

## KRISIS ADAT DALAM LUAK TANAH MENGANDUNG

A. Aziz Hitam

### PENDAHULUAN

Adat Perpatih adalah satu peraturan hidup yang merupakan satu kawalan sosial dan juga merupakan satu sistem kekerabatan yang amat liberal dan menyeluruh. Bagi penduduk Negeri Sembilan yang mengamalkan Adat Perpatih mereka tidak dapat menghindarkan diri dari pengaruh dan peranan adat itu yang telah membendung masyarakat Negeri Sembilan sejak beberapa kurun silam.

Keadilan adalah merupakan satu aspek yang amat dipentingkan dalam Adat Perpatih:

- Ibarat menarik rambut dalam tepung
- Rambut jangan putus
- Tepung jangan terserak

Perbilangan ini adalah panduan kepada seseorang ketua adat dalam menyelesaikan sesuatu krisis yang berlaku di kalangan anak-anak buahnya.

Krisis di dalam adat adalah suatu yang lumrah, sebagaimana yang terjadi di dalam masyarakat lain juga. Tetapi bagi masyarakat adat cara penyelesaian hendaklah mengikut saluran-saluran adat.

Kajian ini akan memperlihatkan pada pembaca satu contoh krisis adat yang berlaku di kalangan pemakai-pemakai Adat Perpatih. Krisis yang dibicarakan ini dapat dianggap sebagai krisis yang terbesar yang pernah berlaku di Negeri Sembilan di peringkat Perut<sup>1</sup> dan Suku<sup>2</sup>. Krisis di peringkat Perut dan Suku agak sering terjadi, tetapi biasanya krisis itu adalah kecil-kecil belaka dan dapat diselesaikan dalam tempoh yang singkat. Krisis besar yang dimaksudkan ini telah berlaku di kalangan anak-anak buah Suku Seri Lemak Minangkabau di dalam Luak Muar (daerah Kuala Pilah), sejak tahun 1968 dahulu. Hingga sekarang krisis ini masih lagi tidak dapat penyelesaian yang positif.

### LUAK TANAH MENGANDUNG

Untuk lebih memahami keadaan krisis itu nanti, ada baiknya jika diterangkan sedikit struktur Luak Tanah Mengandung yang



ada kaitannya dengan konflik dalam Suku Seri Lemak Minangkabau itu. Luak Tanah Mengandung itu ialah wilayah adat yang dikuasai oleh Yang Dipertuan Besar Seri Menanti.

Wilayah berkenaan ialah Luak Muar, Luak Terachi, Luak Jempul dan Luak Gunung Pasir. Tiap-tiap luak itu diketuai oleh seorang besar adat yang dinamakan Penghulu Luak. Di bawah Penghulu Luak ialah beberapa orang Lembaga. Seorang Lembaga itu bertanggungjawab mengetuai satu 'suku'. Di bawah Lembaga itu pula terdapat beberapa orang 'buapak' yang menjadi ketua dalam satu 'perut'.

#### LATAR BELAKANG KRISIS

Empat perut yang dibicarakan di dalam krisis adat ini ialah terdiri dari perut-perut Galau, Jumbang, Kg. Umor dan Juaseh (Ulu Juaseh). Menurut beberapa orang yang bertanggungjawab dalam adat di dalam kawasan ini, keempat-empat dinyatakan tadi adalah asalnya tertakluk di bawah kuasa Luak Gunung Pasir di bawah naungan Datuk Lembaga Senara Muda.

Menurut salasilahnya, pada suatu masa dahulu (tidak diketahui tarikhnya pembahagian semula telah dibuat antara Luak Gunung Pasir dan Luak Muar. Sempadan yang menetapkan pembahagian itu ialah mengikut: 'Alur naga dan bangkung berderet, kiri mudik Luak Gunung Pasir, kanan mudik Luak Muar'. Dengan pembahagian sempadan yang baru ini maka perut-perut Galau, Jumbang, Kg. Umur dan Juaseh telah jatuh ke dalam Luak Muar dan tidak lagilah di bawah Luak Gunung Pasir.

Keadaan yang demikian telah membuatkan perut yang empat tadi dianggap menumpang sahaja dalam Luak Muar dengan bemaung di bawah Lembaga Datuk Senara Muda. Keempat-empat perut tadi telah bersatu dengan perut Mertang dengan diketuai oleh seorang buapak yang bergelar Setia Muda.

Sejak pembahagian itu maka keempat-empat perut tadi telah hidup bersama-sama sebagai satu keturunan dengan perut Mertang sebagai satu waris. Menurut Adat Perpatih orang-orang yang satu waris adalah dilarang berkahwin sesama mereka kerana mereka dianggap satu keturunan. Tetapi ironinya lama-kelamaan penghuni-penghuni perut Mertang dan perut yang empat tadi telah melanggar pantang larang adat dengan berkahwin antara mereka. Anak-anak buah dari Mertang dan keempat perut tadi telah banyak melakukan perkahwinan atau semenda-menyemenda. Hal ini tentu saja sudah melanggar adat andainya mereka menganggap diri mereka sewaris. Menikah sewaris adalah merupakan satu kesalahan



besar dalam Adat Perpatih. Tetapi semenda-menjemenda itu telah menjadi awalan.

Atas dasar inilah maka anak-anak buah dari perut Galau dan perut yang lain-lain tadi merasakan bahawa mereka masih dianggap menumpang pada luak Mertang. Perasaan ini ditambah lagi apabila ada anasir-anasir yang mengatakan bahawa keturunan mereka tidak berhak untuk menyandang pusaka Lembaga Senara Muda. Mereka cuma layak memegang jawatan buapak sahaja. Dalam kata lain perut yang empat itu mempunyai status yang lebih rendah dari perut Mertang. Kedudukan mereka tidaklah sempurna di bawah naungan Lembaga Senara Muda.

Untuk mendapatkan status yang sewajarnya waris-waris dari perut Galau telah mewakili perut-perut yang lain untuk berunding dengan Penghulu Luak Muar, berkenaan kedudukan mereka di bawah naungan Datuk Senara Muda. Bagaimanapun penghulu tersebut masih lagi memberi pengakuan bahawa keempat-empat perut itu adalah sewaris dengan perut Mertang. Tetapi pengakuan demikian tidaklah memberi apa-apa kesan. Anak-anak buah antara Mertang dan perut yang empat tadi masih juga meneruskan kahwin sewaris (terutamanya antara Galau dan Mertang).

Keadaan makin meruncing apabila Datuk Senara Muda Haji Lateh telah meninggal dunia [pada 1965 (?)]. Apabila pemilihan Datuk Senara Muda yang baru dijalankan pada tahun 1966 buapak-buapak Suku Seri Lemak Minangkabau dari perut Parit, Mertang, Seri Menanti dan Pilah telah sebulat suara mengatakan bahawa perut Galau dan perut-perut yang tiga lagi itu tidak dibenarkan untuk bertanding. Perut-perut Galau itu adalah dikatakan tidak berhak menuntut pusaka Lembaga Senara Muda atas alasan mereka adalah orang mendatang dan menumpang. Perut Galau tidak dianggap sewaris dengan mereka.

#### PERLUCUTAN JAWATAN BUAPAK GALAU

Setelah pemilihan jawatan Datuk Senara Muda dijalankan maka pusaka itu telah jatuh kepada seorang tokoh baru dari perut Parit iaitu Muhammad Pilus bin Maaris. Beliau teruslah menjalankan tugasnya sebagai Datuk Senara Muda iaitu lembaga waris Seri Lemak Minangkabau Luak Muar.

Sejak dahulu lagi (1960) jawatan buapak perut Mertang, Galau dan yang lain-lain adalah dipegang oleh Setia Muda Abu Samah bin Ali. Satu kegemparan telah berlaku apabila Datuk Senara Muda Pilus memegang jawatan. Beliau telah mengesahkan jawatan seorang buapak lagi dari perut Mertang iaitu Md. Nor bin Pilus. Perlantikan buapak yang baru itu dengan secara tidak langsung berarti tidak mengiktiraf kedudukan buapak Setia Muda Abu Samah.



Tindakan ini tentu saja menimbulkan tidak puas hati di kalangan anak buah yang selama ini dianggap perut menumpang. Mereka terasa begitu terhina dan tidak dikehendaki. Implikasi dari perlantikan buapak baru adalah juga bererti bahawa perut-perut Galau dan lain-lain itu tidak berhak menyanggah pusaka buapak apatah lagi pusaka lembaga. Mereka merasai bahawa waris-waris mereka tiada berpusaka. Ini adalah dayus dari sisi masyarakat Perpatih di Negeri Sembilan.

Di samping itu pula perut Mertang tetap teguh dengan prinsip mereka, untuk mendapatkan jawatan buapak itu. Ada juga anasir mengatakan bahawa orang-orang dari perut Galau adalah tidak layak bersama-sama mereka kerana perut ini adalah dianggap dari keturunan hamba abdi. (Sejauh mana kenyataan itu benar tidak dapat disahkan kerana tiada bukti-bukti yang nyata).

#### BANTAHAN

Untuk mengatasi konflik yang terjadi itu maka satu perjumpaan ramai telah diadakan di rumah tua Galau<sup>3</sup> antara perut-perut Galau, Jumbang, Kg. Umur dan Juaseh. Perjumpaan pertama itu telah diadakan pada 27hb. Julai, 1968 jam 9.00 malam yang dihadiri oleh kira-kira 60 orang. Perbincangan pada malam itu adalah keseluruhannya tentang lantikan buapak baru dari perut Mertang yang dilantik tanpa pengetahuan perut-perut yang lain. Hadirin yang terdiri dari 'tempat semenda yang seadat' dan 'orang semenda yang seresam' telah berasa begitu kesal atas pengesahan Datuk Senara Muda Muhammad Pilus ke atas lantikan buapak Md. Nor bin Pilus itu, sedangkan buapak Setia Muda Abu Samah masih ada lagi, dan tidak cacat celanya.

Hadirin pada malam itu telah sebulat suara setuju membuat keputusan iaitu membuat bantahan terhadap lantikan Datuk Senara Muda ke atas buapak yang baru, dan menerima kembali buapak Setia Muda Abu Samah Ali.<sup>4</sup> Satu surat bantahan kepada Datuk Senara Muda telah ditulis. Antara lain surat itu berbunyi:

'Oleh sebab buapak yang lama (Setia Muda Samah bin Ali) masih lagi kami akui sebagai buapak.

Nampaknya sekarang ini telah berlakulah pantang adat. Manalah pantang adat 'satu kapal dua nakhoda, sebatang enau dua sigai, satu waris dua buapak'. Mengikut kata adat 'pusaka yang satu sebagai buapak, pecat hidup kerelaan dan pecat mati berkerapatan waris pusaka dan waris-waris adat'. Sebagaimana juga kata perbilangan 'Yang patah tumbuh dan yang hilang



berganti'. Sekarang ini belum patah sudah tumbuh dan belum hilang sudah berganti yang mana akibatnya amat mendalam dirasakan oleh anak-anak buah datuk. Perpecahan dan keretakan dalam waris ini tidak dapat dielakkan, tambahan pula perut Mertang dan Galau ini saling semenda-menyemenda antara satu dengan lain'.<sup>5</sup>

Selain dari isi yang disebutkan di atas surat itu adalah meminta Datuk Senara Muda menyelesaikan pertelingkahan yang berlaku di dalam waris itu. Di samping itu pula surat itu menyatakan penolakan perut Galau dan lain-lain tadi ke atas perlantikan buapak yang baru itu, dan masih mahu mengakui buapak yang sedia ada.

Satu surat lagi telah dihantar kepada Datuk Senara Muda pada 7hb. Ogos, 1968 oleh anggota perut Galau, Jumbang dan Kg. Umur memberitahu bahawa mereka akan berkunjung ke rumah beliau pada hari Sabtu 10hb. Ogos, 1968. Tujuan rombongan itu adalah untuk berkenalan dengan Datuk Lembaga baru mereka, dan juga untuk mengemukakan bantahan atas lantikan buapak yang baru disahkan oleh beliau. Rombongan itu dikatakan akan sampai ke rumah Datuk Senara Muda di Kg. Parit (kira-kira 11 batu dari Kg. Galau) pada pukul 4.00 petang.<sup>6</sup>

Pada 10hb. Ogos, 1968 lebih kurang 80 orang anggota suku Seri Lemak Minangkabau yang terdiri dari perut Galau, Jumbang, Kg. Umur dan Juaseh telah berarak ke telapak Datuk Senara Muda. Rombongan itu telah diketuai oleh Ahmad bin Mansor.<sup>7</sup> Perarakan itu telah membawa surat bantahan yang bertulis Jawi, dan dibawa oleh seorang wanita bernama Zainab binti Hj. Cik Wan. Surat bantahan itu telah dibalut dengan kain songket benang mas merah mengikut adat tradisional.

Tujuan rombongan tersebut adalah untuk meminta Datuk Senara Muda menyelesaikan kekeruhan yang telah berlaku di antara anak buahnya. Di samping itu juga mereka meminta supaya Datuk Senara Muda mengiktiraf semula waris-waris empat perut itu duduk bernaung di bawah beliau dengan mendapat hak-hak yang sama seperti perut Mertang, Parit, Seri Menanti dan Pilah.

Malangnya rombongan itu telah tidak dapat menyampaikan surat bantahan itu kerana Datuk Senara Muda tidak ada di rumah. Sewaktu rombongan itu sampai beliau dan keluarganya telah berada di Kuala Lumpur. Cuma yang ada di rumah ialah ibu mertua beliau. Rombongan itu berasa begitu kesal dan hampa kerana kedatangan mereka tidak dinanti, walaupun sudah diberitahu tentang kedatangan rombongan itu dengan 'A.R. Register'.

Di sini ada dua kemungkinan berlaku: Pertamanya Datuk Senara Muda sengaja mengelakkan diri dari berjumpa dengan anak-anak



buahnya yang datang membawa masalah yang sukar diselesaikan. Keduanya ialah mungkin surat dari rombongan itu terlalu lewat sampainya ke tangan Datuk Senara Muda, kerana surat yang diantar itu bertarikh 7hb. Ogos, sedangkan mereka mahu datang pada 10hb. Ogos. Justeru itu mungkin beliau tidak sanggup menerima tetamu yang begitu ramai secara mendadak.

Anak-anak buah dari empat perut yang gagal menemui lembaganya itu tidak berpuas hati. Mereka terus membuat tindakan yang lebih positif lagi. Perjumpaan-perjumpaan terus diadakan di rumah tua Galau lagi dengan diwakili oleh anak-anak buah dari perut Jumbang, Kg. Umur dan Juaseh. Dalam perjumpaan yang tidak begitu penting atau yang dibuat secara tiba-tiba wakil-wakil dari Juaseh tidak dapat menghadirinya, kerana mereka adalah agak jauh dari Kg. Galau. Namun demikian segala perkembangan perkembangan baru sentiasa dikhabarkan kepada pihak Juaseh, dan pihak Juaseh juga menyetujui semua keputusan dan saranan yang dibuat di Galau.

Antara lain keputusan yang telah diambil ialah membentuk sebuah jawatankuasa bertindak dipengerusikan oleh Lebai Yusof bin Bahali. Jawatankuasa telah memutuskan untuk pergi mengadap Datuk Penghulu Luak Muar yang tinggal di Kg. Talang.

Pada 23hb. Ogos, 1968 satu rombongan seramai lebih kurang 40 orang telah pergi mengadap Datuk Penghulu Luak Muar, yang diketuai oleh Alias bin Buyong. Alias bin Buyong telah menerangkan keadaan yang telah berlaku dalam waris Seri Lemak Minangkabau tentang peristiwa pengesahan seorang buapak baharu oleh Datuk Senara Muda dari perut Mertang tanpa membawa perundingan dengan perut-perut yang lain. Juga diterangkan tentang status perut yang empat itu tiada dibenarkan menyandang pusaka lembaga.

Penghulu Luak Muar telah menyatakan bahawa beliau tidak dapat menyelesaikan perkara itu. Beliau menyatakan bahawa cuma Datuk Senara Muda sendirilah yang dapat menyelesaikannya. Sekali lagi perut yang empat itu berasa hampa. Sementara itu surat dari Datuk Senara Muda telah diterima menerangkan seperti yang tersiar di dalam akhbar *Utusan Zaman* bertarikh 11hb. Ogos, 1968. Beliau telah mengirimitkan keputusan perjumpaannya dengan buapak-buapak Parit, Mertang, Seri Menanti dan Pilah. Perjumpaan mereka itu telah juga dihadiri oleh Datuk Setia Maharaja Lela Pahlawan, Penghulu Luak Muar.

Antara lain Datuk Senara Muda telah menyatakan bahawa:

A. Kedatangan rombongan dari perut Galau, Jumbang, Kg. Umur dan Juaseh pada 10hb. Ogos, 1968 adalah dianggap mencero boh, menyalahi undang-undang adat dan negeri, kerana



tiada izin tuan rumah dan berlagak sesuka hati seperti mengambil gambar dalam rumah dengan bebas. Kedatangan rombongan perut Galau, Jumbang, Kg. Umor dan Juaseh tidak dinanti adalah kerana:

- i. Memberitahu dengan surat A.R. Register itu tidak kena pada tempatnya.
- ii. Surat yang dikirim itu adalah surat salinan.
- iii. Surat itu tidak ditandatangani.

Datuk Senara Muda menganggap surat itu adalah surat palsu yang ditulis oleh orang yang tidak mahu bertanggungjawab dan tidak berfikiran waras. Dengan itu beliau telah mengambil keputusan tidak melayan tujuan surat itu. Tambahan pula kata beliau lagi, pada 10hb. Ogos ia ada urusan menghadiri istiadat menghantar cincin anak saudaranya di Kuala Lumpur.

B. Jawatan buapak yang disandang oleh Abu Samah bin Ali telah jatuh dengan sendirinya kerana ia engkar dan derhaka kepada tanggungjawabnya sebagai buapak. Beliau telah meninggalkan anak-anak buahnya dan masuk bertanding hendak menjadi Lembaga. Kejatuhan kebuapakannya itu telah disahkan oleh Penghulu Luak Tanah Mengandung, kerana adat berkata: Sebulat suara anak buah menjadikan buapak, dan sebulat suara buapak menjadikan Lembaga, bukannya buapak menjadi Lembaga. Oleh kerana itu beliau tidaklah boleh lagi memegang jawatan itu lagi.

Surat Datuk Senara Muda itu juga menyatakan bahawa keempat-empat buapak yang bermesyuarat dengan beliau telah sebulat suara mengatakan yang perut Galau dan waris-warisnya bukanlah keturunan Datuk Puteh atau Datuk Pandak.<sup>9</sup> Buapak-buapak yang bermesyuarat dengan Datuk Senara Muda itu telah sepakat mengatakan bahawa empat perut itu (Galau, Jumbang, Kg. Umur dan Juaseh) adalah cuma bernaung di bawah tadbiran Lembaga Datuk Senara Muda Luak Muar, iaitu sesudah pembahagian antara Luak Muar dan Luak Gunung Pasir.

Untuk membersihkan nama baik perut Mertang, buapak berempat yang bermesyuarat itu telah sebulat suara mencadangkan supaya dikeluarkan saja perut-perut Galau, Jumbang, Kg. Umur dan Juaseh itu dari bawah perintah buapak Setia Muda. Ini adalah bertujuan untuk memberisihkan tuduhan bahawa anak-anak buah Mertang menyemenda dengan perut-perut yang empat tadi, iaitu kahwin sewaris.

Untuk menguatkan pendapat ini Datuk Senara Muda telah mengatakan bahawa Encik Rashid, bekas buapak Mertang telah memberi penjelasan bahawa keempat-empat perut itu



hanya bernaung di bawah tadbiran Lembaga Seri Lemak Minangkabau, dan anak buahnya tidak berhak menuntut pusaka Lembaga.

Itulah isi kandungan surat Datuk Senara Muda yang diterima oleh pihak Galau. Dari isi surat itu dapat dirumuskan bahawa Datuk Senara Muda sendiri memang kuat untuk mengenyepikan anak-anak buahnya dari empat perut yang berkenaan, dan menekankan bahawa mereka itu cumalah menumpang. Dari surat itu juga dapatlah diambil kesimpulan bahawa perut Galau dan waris-warisnya yang lain itu tidak mempunyai buapak lagi. Datuk Senara Muda tidak pula membincangkan jalan-jalan untuk menyelesaikan pertikaian yang berlaku di kalangan anak buahnya itu.

#### REAKSI DARI SURAT DATUK SENARA MUDA

Keputusan perjumpaan Datuk Senara Muda dengan buapak-buapak dari perut Mertang, Parit, Seri Menanti dan Pilah itu telah meranjatkan pihak perut Galau dan tiga perut yang lain. Mereka kesal terhadap tindakan Datuk Senara Muda memusingkan isu yang sebenarnya.

Di dalam suratnya kepada Datuk Senara Muda, Setia Pahlawan yang mewakili keempat perut berkenaan telah menangkis tuduhan Lembaga itu.

- i. Rombongan ke telapak Datuk Senara Muda itu tidak dianggap mencero boh kerana kedatangan mereka itu telah dihantar dengan surat, dan tiada pula diterima jawapan mengatakan Datuk Senara Muda tidak dapat menunggu kedatangan rombongan itu. Kedatangan mereka juga telah disambut baik oleh ibu mertua Datuk itu dan diperilakan masuk walaupun rombongan itu enggan pada mulanya untuk masuk.
- ii. Tuduhan tidak mengikut aturan adat itu tidak dapat diterima kerana rombongan itu naik ke telapak Datuk Senara Muda dengan keizinan. Rombongan telah membawa tepak sirih dan juga buah tangan. Sedangkan tujuan rombongan itu juga adalah baik, iaitu minta jernihkan yang keruh.
- iii. Pihak rombongan tidak pernah mengambil sebarang gambar di dalam rumah Datuk Senara Muda. Gambar-gambar telah diambil oleh wakil Utusan Melayu.
- iv. Berkenaan surat yang dihantar tidak ditandatangani itu, pihak empat perut telah mengakui sebagai satu kesalahan



yang tidak disengajakan. Walaupun surat yang dihantar itu satu surat salinan (oleh kerana kesilapan juga) namun mereka menganggap itu adalah satu surat asal dan salinannya ada disimpan. Surat yang dihantar dengan A.R. Register itu adalah bertujuan supaya kedatangan mereka dipandang berat.

Selain dari itu surat dari Setia Pahlawan telah menyatakan kesalnya terhadap keputusan yang diambil oleh Datuk Senara Muda. Walau bagaimanapun beliau telah mengucapkan terima kasih di atas cadangan Lembaga itu yang cuba hendak membuang empat perut tadi dari Suku Seri Lemak Minangkabau dan Luak Muar. Menurut pendapat perut Galau dan perut-perut yang berkenaan pembuangan perut yang empat itu akan menyenangkan perut-perut Mertang, Seri Menanti, Pilah dan Parit untuk menyandang gelaran pusaka Lembaga Senara Muda nanti.

Pendapat ini agak lojik juga kerana dengan pembuangan perut Galau, Jumbang, Kg. Umur dan Juaseh itu nanti maka peluang bagi perut Mertang, Pilah, Seri Menanti dan Parit untuk mewarisi pusaka Lembaga Datuk Senara Muda adalah lebih baik lagi, dan akan berkurangnya persaingan.

Surat Setia Pahlawan itu seterusnya meminta supaya Datuk Senara Muda akan berfikir lebih panjang lagi dan jangan terpengaruh oleh orang-orang yang tidak bertanggungjawab. Beliau berharap supaya Datuk Senara akan dapat mencari perpaduan dan bukannya perpecahan.<sup>10</sup>

#### PERTEMUAN DENGAN PENYELIA ADAT KUALA PILAH (LUAK TANAH MENGANDUNG)

Setelah beberapa kali mengadakan mesyuarat tentang pengeluaran perut Galau dari bawah naungan Buapak Setia Muda oleh Datuk Senara Muda itu maka mengambil keputusan menerima pengeluaran itu. Dengan itu bermakna perut Galau dan pecahannya yang lain itu tiada berbuapak lagi, dan juga tiada berlembaga lagi.

Tindakan seterusnya ialah mengadakan krisis adat itu kepada Penyelia Adat Kuala Pilah iaitu Tengku Nasir. Dengan itu satu rombongan seramai kira-kira 50 orang telah datang berjumpa Tengku Laxmana pada 24hb. September, 1968 dalam satu istiadat di Istana Besar Seri Menanti.

Antara lain yang turut hadir pada hari itu ialah ketua-ketua adat istana iaitu Tengku Laxmana Nasir, Tengku Imam, Tengku Kecil Muda A. Rahim, Datuk Penghulu Dagang Adam bin Yusuf, Datuk Raja Dewangsa Muhammad Yunus, Datuk Setia Bijaya Abd. Rauf dan Datuk Andatar.



Perkara tersebut telah dibincangkan dengan panjang lebarnya oleh pihak pemegang adat istana. Pengeluaran Datuk Senara Muda terhadap perut Galau dan pecahannya yang lain adalah dianggap sah, dan perkara itu juga telah dipersetujui oleh pihak Galau.

Untuk menyelesaikan keadaan perut Galau yang tiada berbua-pak dan tidak boleh menyandang gelaran lembaga itu satu. Tengku Laxmana Nasir telah meminta buah fikiran dari anak-anak raja bergelar dan juga Orang Besar Empat. Datuk Penghulu Dagang Adam telah menyarankan supaya empat perut itu mengamalkan Adat Lingkungan untuk menyelesaikan masalah. Raja Mohd. Nordin Al-haj juga telah memberi penerangan yang serupa. Saranan itu telah disokong oleh beberapa orang besar istana dan juga oleh anak raja bergelar. Selanjutnya Tengku Imam dan Datuk Raja Dewangsa telah menerangkan peraturan-peraturan Adat Lingkungan.

Dalam perbahasan itu anak-anak buah dari perut Galau telah tertarik dengan cadangan-cadangan yang dibincangkan oleh pihak pemegang adat dan wakil-wakil ketua perut Galau itu. Akhirnya waris Galau itu telah bersetuju untuk masuk mengamalkan Adat Lingkungan.

#### ADAT LINGKUNGAN

Ekoran cadangan dan nasihat Tengku Laxmana Nasir dalam mengamalkan Adat Lingkungan telah dibincangkan oleh anak-anak buah empat perut untuk mendapatkan kata sepakat dan rumusan yang sebulat suara.

Satu perjumpaan ramai telah diadakan di rumah tua Galau pada 12hb. Oktober, 1968. Turut hadir pada perjumpaan itu ialah Orang Besar Empat Istana yang terdiri dari Datuk Penghulu Dagang Adam, Datuk Raja Dewangsa, dan wakil anak raja bergelar iaitu Tengku Kecil Muda Abd. Rahim.

Ketua-ketua adat yang diundang telah memberi penerangan berkenaan kedudukan waris empat perut yang ingin mengamalkan Adat Lingkungan itu. Pada hari tersebut juga telah diadakan satu undian untuk menentukan sama ada waris empat perut itu setuju atau tidak mengamalkan Adat Lingkungan. Mengikut keputusan undi 98% bersetuju mengamalkan Adat Lingkungan. Mereka yang tidak bersetuju adalah kira-kira terdiri dari empat keluarga yang mengandungi lebih kurang dua puluh orang. Golongan minoriti ini adalah dari penduduk Galau.<sup>11</sup> Mereka adalah menyokong kuat pihak perut Mertang dan Lembaga Datuk Senara Muda.

Untuk membuatkan keputusan itu lebih konkrit lagi maka waris-waris telah menurunkan tandatangan sebagai memberikan pegakuan yang sah. Tandatangan telah disampaikan kepada Penye-lia Adat, Tengku Laxmana Nasir, pada 24hb. Oktober, 1968, di



dalam satu istiadat di kediaman Tengku Laxmana Nasir sendiri.

Dalam keadaan yang demikian maka Datuk Senara Muda telah berasa agak serba-salah atau mungkin merasa bersalah sebab selama ini tidak menghiraukan masalah anak buahnya di Galau dan waris-warisnya. Dengan itu satu perjumpaan dengan Tengku Laxmana Nasir telah diadakannya pada 17hb. November, 1968. Turut hadir pada perjumpaan itu ialah Tengku Imam, Tengku Kecil Muda dan Penghulu Luak Muar bersama seorang Lembaganya.

Datuk Senara Muda telah menerangkan bahawa beliau tidak pernah mengeluarkan anak-anak buah beliau dari tadbirannya, tetapi itu adalah cadangan dari buapak yang berempat dari Suku Seri Lemak Minangkabau, akibat dari tindak-tanduk sebahagian dari anak-anak buah itu terhadap Lembaganya. Tengku Laxmana telah memulangkan kepada Datuk Senara Muda sendiri untuk menyelesaikan selisih faham itu. Datuk Senara Muda telah memberitahu bahawa sebelum dibawa ke meja perundingan pihak yang bertanggungjawab di dalam perut Galau dan waris-warisnya mestilah memenuhi syarat iaitu:

- i. Orang-orang yang bertanggungjawab dalam empat perut itu hendaklah menarik balik segala tuduhan-tuduhan terhadap beliau yang terdapat di dalam akhbar.
- ii. Mereka mestilah mengaku dan sedar bahawa mereka adalah bernaung di bawah tadbiran Lembaga Senara Muda dan patuh kepada buapak-buapak yang empat.
- iii. Mereka hendaklah mengaku segala kesalahan yang mereka lakukan dan hendaklah menunaikan hukuman adat.

Datuk Senara Muda akan cuma setuju membawa apa saja tuntutan anak-anak buah beliau setelah syarat-syarat tadi dipenuhi. Namun demikian tidak ada sebarang rundingan pun dijalankan antara Datuk Senara Muda dan anak-anak buahnya di Galau. Masing-masing tetap teguh dengan prinsip masing-masing. Sedangkan bagi pihak perut-perut di Galau dan warisnya di Jumbang, Kg. Umur dan Juaseh juga mahu keluar dari bawah naungan Datuk Senara Muda.

Satu rombongan telah diadakan sekali lagi dari Galau untuk mengadap Yang Dipertuan Besar Negeri Sembilan di Istana Hinggap Seremban pada 26hb. Februari, 1969. untuk membincangkan soal krisis adat itu. Rombongan ini telah diketuai oleh Datuk Penghulu Dagang Adam bin Yusuf. Rumusan perjumpaan itu ialah persetujuan Penyelia Adat menerima waris-waris Galau untuk masuk mengamalkan Adat Lingkungan. Perkara itu diperseetujui oleh Penyelia Adat untuk menyampaikannya kepada penge-



tahuan kerajaan Negeri Sembilan. Dengan itu juga Penyelia Adat telah mengesyorkan supaya seorang besar waris dilantik sebagai Lembaga perut Galau, Jumbang, Kg. Umur dan Juaseh. Beliau telah memberi dua nama gelaran untuk dipilih iaitu:

- i. Datuk Setia Maharaja Bakti
- ii. Datuk Setia Raja Bakti.

Gelaran Datuk Maharaja Setia Bakti telah diterima dan keputusan ini telah disampaikan kepada Penyelia Adat.

#### DATUK MAHARAJA SETIA BAKTI

Satu permuafakatan telah dilakukan untuk menentukan gelaran perut yang empat itu menyandang gelaran pusaka Lembaga. Keempat-empat perut itu telah dapat kata sepakat bahawa pusaka itu disandang oleh perut Galau dahulu, giliran kedua jatuh kepada Kg. Umur, ketiga jatuh kepada Jumbang dan giliran keempat kepada Juaseh.

Setelah gelaran itu ditentukan maka anak-anak di perut Galau yang mendapat giliran yang pertama telah berunding pula untuk memilih ketua mereka yang akan menyandang pusaka Datuk Maharaja Setia Bakti. Perut Galau telah sebulat suara untuk meletakkan gelaran itu kepada Alias bin Buyung, iaitu seorang guru sekolah kebangsaan yang berumur kira-kira 36 tahun. Selama pergolakan itu berlaku beliau adalah antara orang yang banyak sekali menghabiskan masa untuk menyelesaikan kekusutan itu. Di samping itu beliau juga menunjukkan minat yang kuat terhadap krisis adat yang sedang berlaku sejak beberapa bulan di kampung itu. Alias bin Buyung adalah anak Galau yang berkahwin di Kg. Buyau, Seri Menanti.

Puncak dari perjuangan perut Galau dan waris-warisnya ialah istiadat perasmian secara besar-besaran. Perasmian itu telah diadakan di rumah tua Galau pada 31hb. Januari, 1969, dan dihadiri oleh semua anak-anak buah dari empat perut itu. Turut menyaksikan ialah Penyelia Adat Tengku Laxmana Nasir, Anak-anak Raja Bergelar, Orang Besar Empat Astana dan beberapa orang datuk Lembaga dari Luak Muar. Perasmian itu telah dijalankan dengan penuh istiadat tradisional yang sangat meriah sekali.

Pada 8hb. Februari, 1969, Tengku Laxmana telah menulis surat kepada Setiausaha Kerajaan Negeri Sembilan untuk meminta diwartakan suku Seri Lemak Minangkabau Luak Muar perut Galau, Jumbang, Kg. Umur dan Juaseh masuk ke dalam Adat Lingkungan.



Berita empat perut yang keluar beramai-ramai dari Suku Dua Belas untuk mengamalkan Adat Lingkungan itu telah menggem-parkan seluruh Negeri Sembilan malahan telah tersiar di dalam akhbar-akhbar tempatan. Beberapa orang yang mengikut perkembangan krisis adat itu telah juga menimbulkan polimik di dalam akhbar *Utusan Melayu*. Di antara mereka ada yang berpendapat bahawa tindakan keluar dari Suku itu adalah satu langkah yang tidak bijak. Tetapi sebagai menangkis pendapat itu Datuk Maharaja Setia Bakti (Cikgu Alias Buyung) telah menyatakan dalam satu sidang akhbar bahawa waris tiap-tiap suku itu ada ketuanya, sebagai perbilangan adat "anak buah berbuapak, buapak berlembaga, luak berpenghulu, alam beraja". Oleh kerana perut-perut itu tiada berbuapak dan tiada berlembaga, hanya menumpang saja maka itulah sebabnya mereka berbuat demikian.<sup>1 2</sup>

Tarikh 31hb. Januari, 1969, iaitu hari perasmian empat perut itu keluar dari bawah naungan Datuk Senara Muda adalah merupakan detik penting dari perjuangan empat perut itu. Hari tersebut juga adalah menjadi satu peristiwa penting bagi kira-kira dua ribu orang penduduk dalam empat perut itu dalam mengalami satu corak adat yang agak baru bagi mereka, walaupun tidak banyak sangat perbezaan. Walau bagaimanapun beberapa anasir yang tidak menyenangkan sering juga timbul sekali-sekala akibat dari protes pihak anggota yang tidak menyetujui langkah yang diambil oleh empat perut itu. Kadangkala keharmonian (di kampung Galau ter-utamanya) telah tergugat kerana reaksi orang-orang yang pro-Datuk Senara. Keadaan yang mengganggu ketenteraman ini tidak wujud di Jumbang, Kg. Umor dan Juaseh kerana anak-anak buah di dalam tiga perut ini semuanya bersetuju atas tindakan masuk ke dalam Adat Lingkungan.

#### TERTANGGUH

Semenjak empat perut yang diketuai oleh Datuk Maharaja Setia Bakti mengamalkan Adat Lingkungan beberapa bulan lamanya, namun surat dari pihak kerajaan belum juga lagi diterima mengenai menggezetkan empat perut itu.

Dalam pada itu pihak kerajaan telah menangguhkan pula untuk mewartakan empat perut itu mengamalkan Adat Lingkungan kerana adanya tentangan beberapa anggota dari perut Galau yang tidak setuju dengan langkah masuk mengamalkan Adat Lingkungan. Datuk Setia Maharaja Bakti telah beberapa kali menguruskan soal ini dengan pihak kerajaan. Sebaliknya Yang Dipertuan Besar telah menubuhkan jawatankuasa menyiasat bagi pihak Dewan Keadilan. Pada 17hb. Januari, 1970 surat dari Dewan Keadilan telah diterima. Surat itu menyatakan penerimaan Yang Di-



pertuan Besar akan waris-waris empat perut itu mengamalkan Adat Lingkungan. Surat itu menyatakan juga bahawa baginda telah berkenan mengurniakan gelaran Datuk Setia Maharaja Bakti kepada Alias bin Buyung sebagai Lembaga kepada empat perut itu. Surat itu dapat menyenangkan waris empat perut yang sebelum itu berasa agak ragu-ragu.

Pada 17hb. Februari, 1970 iaitu kebetulan, ketika menyambut Hari Raya Haji waris-waris empat perut itu (kira-kira 200 orang) telah mengiringi Datuk Maharaja Setia Bakti menghadap Yang Dipertuan Besar di Istana Besar Seri Menanti. Turut hadir dalam majlis itu ialah Penolong Pegawai Daerah Kuala Pilah, Ketua Polis Kuala Pilah, Anak-anak Raja Bergelar, dan Orang Besar Empat Istana. Pada hari itu Penyelia Adat Tengku Laxmana tiada turut serta kerana beliau berada di Mekah menunaikan fardu Haji, dengan itu tugas beliau telah digantikan sementara oleh Tengku Alang Hanan.

Dengan pengesahan pada hari tersebut oleh Yang Dipertuan Besar Negeri Sembilan, maka Datuk Maharaja Setia Bakti dan pengikut-pengikutnya menganggap segala perjuangannya telah tercapai.

Dengan penerimaan rasmi dari Yang Dipertuan Besar itu maka Datuk Senara Muda Pilus bin Maaris bagi Suku Seri Lemak Minangkabau tidak lagi berkuasa terhadap pentadbiran anak buah empat perut tersebut. Penerimaan rasmi itu juga telah menambah bilangan Perut yang bernaung dan berlindung dalam lingkungan istana menjadi tujuh semuanya iaitu:

- i. Seri Lemak Pahang (Senaling)
- ii. Seri Lemak Minangkabau (Peraku)
- iii. Batu Hampar 40 (Pelangai)
- iv. Tanah Datar (Gunung Pasir)
- v. Batu Hampar (Telapak)
- vi. Batu Hampar (Kg. Tengah)
- vii. Seri Lemak Minangkabau (Galau, Jumbang, Kg. Umur dan Juaseh).

#### JAWATAN BUAPAK

Adalah dipersetujui ramai bahawa Buapak bagi perut-perut Galau, Jumbang dan Kg. Umor jatuh kepada Abu Samah bin Ali dengan gelaran Datuk Setia Raja. Beliau adalah bekas buapak yang lama yang telah dilucutkan gelaran beliau oleh kerana perlantikan buapak baru oleh Datuk Senara Muda. Pengesahan beliau telah diadakan pada bulan Mac, 1970 oleh Tengku Alang Hanan, Pemangku Penyelia Adat. Buapak bagi perut Juaseh pula bergelar Datuk Paduka Raja telah jatuh kepada Haji Kojeng bin Ujang.



Istiadat pengesahannya oleh Tengku Laxmana Nasir telah diadakan pada 24hb. Oktober, 1970.

Bagi perut Juaseh terpaksa diadakan buapak yang berlainan kerana waris-waris di Juaseh itu adalah berjauhan dari perut yang tiga tadi. Dengan itu seorang buapak adalah diperlukan untuk mengendalikan kerja-kerja adat di situ.

#### TANAH PUSAKA ADAT

Ironinya sekali lagi ialah mengenai tanah pusaka. Tanah pusaka adat itu masih lagi belum diwartakan sebagai tanah Adat Lingkungan. Apabila tanah adat pusaka tadi belum diwartakan dalam Adat Lingkungan maka segala pembicaraan tanah pusaka untuk menukar nama adalah ditangguhkan. Datuk Maharaja Setia Bakti sendiri telah beberapa kali menguruskan hal ini kepada Dewan Keadilan, Setiausaha Kerajaan, Pegawai Daerah Kuala Pilah dan juga kepada Yang Dipertuan Besar supaya perkara itu disegerakan.

Senarai nama waris dan nombor-nombor tanah pusaka dalam empat perut itu telah diusahakan oleh Datuk Maharaja Setia Bakti dan buapak-buapaknya.<sup>13</sup> Tengku Laxmana Nasir telah datang ke Galau pada 25hb. April, 1971 untuk mengambil tandatangan tuan-tuan tanah yang masuk Adat Lingkungan bagi tindakan untuk memasukkan tanah adat mereka ke dalam Adat Lingkungan.

Sehingga 31hb. Julai, 1972 Datuk Maharaja Setia Bakti masih lagi menulis surat kepada Setiausaha Kerajaan Negeri Sembilan meminta pihak kerajaan mewartakan tanah pusaka adat empat perut itu. Namun demikian tidak juga ada keputusan yang muktaamad. Dengan itu pada 2hb. Disember, 1973 Datuk Maharaja Setia Bakti telah mengutuskan surat kepada Yang Dipertuan Besar minta agar dapat memasukkan tanah pusaka adat ke dalam warta Adat Lingkungan secepat mungkin.

Bagi jawapannya pihak Yang Dipertuan Besar telah memanjangkan perkara itu kepada Penyelia Adat Luak Tanah Mengandung dan Pemungut Hasil Tanah Kuala Pilah. Tetapi nampaknya tiada juga apa-apa reaksi dari pihak kerajaan. Sehingga makalah ini ditulis dalam tahun 1975 masih lagi pendaftaran tanah adat suku Seri Lemak Minangkabau yang empat itu ditangguhkan. Di samping itu pula selagi tanah itu tidak diwartakan selama itulah pula bicara tukar tanah pusaka adat waris tersebut tergendala.

#### PENUTUP

Jika dipandang dari segi perjuangan penduduk-penduduk Suku Seri Lemak Minangkabau perut Galau, Jumbang, Kg. Umur dan



Juaseh untuk menuntut hak mereka mewarisi pusaka Lembaga, adalah berjaya. Mereka telah memperjuangkannya dengan rapi dan sabar sehingga berjaya diperkenankan oleh Yang Dipertuan Besar Negeri Sembilan mengamalkan Adat Lingkungan dengan bernaung dan berlindung dalam lingkungan istana. Perjuangan itu telah berhasil mendapatkan pusaka Lembaga bagi anak-anak buah empat perut itu.

Dari kajian ini dapatlah kita memerhatikan betapa besarnya peranan adat yang membendung masyarakat Adat Perpatih di Negeri Sembilan itu berpengaruh dalam kehidupan sehari-hari. Juga dapat kita memahami bagaimana masyarakat itu bertindak mengikut saluran-saluran adat yang tertentu, apabila berlaku satu-satu konflik.

Kajian ini walaupun tidak lengkap memperlihatkan krisis-krisis adat yang berlaku dalam masyarakat Adat Perpatih di Negeri Sembilan namun ianya dapat mewakili bentuk krisis yang pernah terjadi dalam masyarakat itu. Krisis adat dalam Luak Tanah Mengandung ini adalah merupakan satu contoh krisis adat yang penting yang pernah berlaku di daerah Kuala Pilah dan di Negeri Sembilan pada keseluruhannya.

### Nota

1. *Perut* ialah anggota-anggota yang mempunyai hubungan kekeluargaan yang jelas dan mereka itu juga pula berasal dari satu nenek moyang yang sama.
2. *Suku* ialah hubungan kekeluargaan antara perut-perut yang ada dalam suku-suku. Ini bererti beberapa buah perut membentuk satu suku yang dipimpin oleh seorang ketua dipanggil Datuk Lembaga.
3. Perjumpaan itu telah diadakan di rumah Puan Tialan binti Shair. Beliau sekarang telah meninggal dunia.
4. Abu Samah bin Ali adalah buapak perut Galau, Mertang, Jumbang, Kg. Umor dan Juaseh sejak dari tahun 1960.
5. Surat ini ditandatangani oleh wakil anak-anak buah Seri Lemak Minangkabau perut Galau, Jumbang dan Mertang (tanda tangan itu tidak dapat dibaca — penulis), bertarikh pada 31hb. Julai 1968.
7. Beliau telah menetap di FELDA, Sendayan, Seremban. Beliau adalah seorang bekas Polis.
8. Kg. Juaseh adalah kira-kira 20 batu dari Kg. Galau. Dalam banyak hal mereka agak pasif, kerana mempunyai anak buah yang kecil bilangannya.
9. Datuk Puteh dan Datuk Pandak adalah dipercayai nenek moyang anak-anak buah Jumbang dan Gunung Pasir.
10. Surat ini telah dihantar oleh Datuk Setia Pahlawan A. Rahman bin Jawa sebagai wakil perut Galau, Jumbang, Kg. Umor dan Juaseh pada 8hb. September, 1968.



11. Golongan minoriti yang cuba menentang semua rancangan waris empat perut itu telah seringkali mewujudkan konflik sesama mereka sekampung, terutamanya dengan penyokong-penyokong Adat Lingkungan. Konflik itu kadangkala sampai ke soalan-soalan peribadi yang tidak ada kaitan. Golongan kecil itu telah mengeratkan hubungan mereka dengan perut Mertang dan jadi penyokong kuat Datuk Senara Muda.
12. *Utusan Melayu*, 8hb. Februari, 1969.
13. Dari senarai yang dikumpulkan itu, telah dicatatkan nombor-nombor tanah pusaka Suku Seri Lemak Minangkabau Lingkungan Galau, Jumbang, Kg. Umur dan Juaseh.  
Dari senarai itu terdapat 28 orang dari perut Galau dengan 50 keping tanah; 12 orang dari perut Kg. Umor dengan 21 keping tanah; 13 orang dari perut Jumbang dengan 24 keping tanah dan 29 orang dari perut Juaseh dengan 25 keping tanah.